

## Cúrsaí tríú leibhéal

**Ceist 1** Beidh tú ag féachaint ar ball ar thuairisc faoi na daltaí scoile a fhreastalaíonn ar chúrsaí tríú leibhéal a bhfuil pointí arda ag dul leo. Sula bhféachann tú ar an mír, an féidir leat féin agus leis an duine in aice leat brí na bhfocal agus na bhfrásaí seo a aimsiú?

1. éagothroime \_\_\_\_\_
2. mionléargas \_\_\_\_\_
3. foras \_\_\_\_\_
4. ailtireacht \_\_\_\_\_
5. innealtóireacht \_\_\_\_\_
6. táillí \_\_\_\_\_
7. sochaí \_\_\_\_\_
8. aicme \_\_\_\_\_
9. cothromaíocht \_\_\_\_\_
10. maoiniú \_\_\_\_\_

Féach ar an mír den chéad uair le feiceáil an gcabhróidh sé sin leat iad a thuiscint.

**Ceist 2** Féach ar an mír den dara huair agus freagair na ceisteanna thíos.

1. Cad iad na samplaí a tugadh sa mhír de chúrsaí tríú leibhéal a bhfuil pointí arda a dhíth le freastal orthu?
2. Cén fáth ar luadh na figiúirí seo?  
20 scoil  
8%  
3 scoil
3. Cad a bhí le rá ag an Ollamh Gerry Ó Ruairc agus ag an gComhairleoir Cathal Ó Conchúir?

**Ceist 3** ‘...figiúirí bliantúla agus ceantair **b**hochtá...’

- A. Cén fáth a bhfuil séimhiú ar an aidiacht iolra ‘bochtá’?
- B. Cuir an fhoirm cheart de na haidiachtaí atá idir lúibíní sna bearnaí:  
  - páistí (beag) \_\_\_\_\_
  - cathaoireacha (dubh) \_\_\_\_\_
  - fir (dathúil) \_\_\_\_\_
  - scoileanna (maith) \_\_\_\_\_
  - ábhair (suimiúil) \_\_\_\_\_
  - gluaisteáin (deas) \_\_\_\_\_
  - turais (fada) \_\_\_\_\_
  - eochracha (mór) \_\_\_\_\_
  - cótaí (trom) \_\_\_\_\_

**Ceist 4** ‘...sin í an fhadhb...’

Is múinteoir í Máire.

1. Cuir Gaeilge ar na ceisteanna seo:

*Is Máire a teacher?*  
*Isn't Máire a teacher?*  
*Is Máire the teacher?*

2. Cad iad freagraí gonta (*yes/no*) na gceisteanna sin?

**Ceist 5** Bhí a lán samplaí de bhreischéim na haidiachta le cloisteáil sa mhír. Scríobh amach iad.

mór	is <i>mó</i>
ard	is _____
deireanach	is _____
maith	is _____
spéisiúil	is _____

**Ceist 6** Pléigh na ceisteanna seo leis an duine in aice leat, nó le do ghrúpa.

1. Cad a léiríonn na figiúirí a luadh sa mhír faoi shochaí na hÉireann, dar leat?
2. Ar cheart go mbeadh oideachas saor do chách, dar leat?
3. Cá bhfaigheann an Stát an t-airgead, dar leat, le híoc as oideachas agus leigheas shaoránaigh na tíre?

## Treoracha agus Freagraí

### Ceist 1

1. éagothroime	<i>inequality</i>
2. mionléargas	<i>detailed insight</i>
3. foras	<i>foundation, institution</i>
4. ailtireacht	<i>architecture</i>
5. innealtóireacht	<i>engineering</i>
6. táillí	<i>fees</i>
7. sochaí	<i>society</i>
8. aicme	<i>class (social)</i>
9. cothromaíocht	<i>balance</i>
10. maoiniú	<i>funding, finance</i>

### Ceist 2

Féach an script.

### Ceist 3

A. Séimhítear aidiachtaí san iolra nuair a leanann siad ainmfhocail a chríochnaíonn le consan caol san iolra, fiú má thagann na litreacha **d, n, t, l, s** le chéile ag deireadh an ainmfhocail agus ag tús na haidiachta.

B.	- páistí (beag)	páistí <u>beaga</u>
	- cathaoireacha (dubh)	cathaoireacha <u>dubha</u>
	- fir (dathúil)	fir <u>dhathúla</u>
	- scoileanna (maith)	scoileanna <u>maithe</u>
	- ábhair (suimiúil)	ábhair <u>shuimiúla</u>
	- gluaisteáin (deas)	gluaisteáin <u>dheasa</u>
	- turais (fada)	turais <u>fhada</u>
	- eochracha (mór)	eochracha <u>móra</u>
	- cótaí (trom)	cótaí <u>troma</u>

### Ceist 4

An múinteoir í Máire?  
Is ea. / Ní hea.

Nach múinteoir í Máire?  
Is ea. / Ní hea.

An í Máire an múinteoir?  
Is í. / Ní hí.

### Ceist 5

mór	is <u>mó</u>
ard	is <u>airde</u>
deireanach	is <u>deireanaí</u>
maith	is <u>fearr</u>
spéisiúil	is <u>spéisiúla</u>

### Ceist 6

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

### Eimear Ní Chonaola

Daltaí a théann chuig scoileanna<sup>1</sup> príobháideacha is mó a théann ar aghaidh go dtí na cúrsaí tríú leibhéal a bhfuil na pointí is airde ag teastáil lena n-aghaidh. Tá an éagothroime idir scoileanna príobháideacha agus scoileanna eile ó thaobh na gcúrsaí tríú leibhéal sin ag méadú chomh maith. Sin a thugtar le fios sna figiúirí is deireanaí a thugann mionléargas dúinn ar na scoileanna agus na ceantair is fearr a chruthaíonn, ó thaobh oideachas tríú leibhéal.

### Sinéad Ní Neachtain

Tugann na figiúirí bliantúla léargas ar líon na ndaltaí a théann ar aghaidh go dtí cúrsaí oideachais tríú leibhéal agus cé acu foras a dtéann siad chuige. Tá leigheas, innealtóireacht agus ailtireacht i measc na gcúrsaí a bhfuil pointí fíorard ag teastáil lena n-aghaidh. Is scoileanna táille iad 20 scoil as an 25 a chuir daltaí ar aghaidh chuig cúrsaí ardphointí i mbliana. Ach léiríonn na figiúirí freisin gur níos lú ná 8% de dhaltaí as ceantair bhochta thart timpeall na tíre a bhí ag tabhairt faoi chúrsaí ardphointí ag an tríú leibhéal. Dar le saineolaí amháin gur léiriú iad na figiúirí seo ar an éagothromaíocht atá i sochaí na tíre.

### An tOllamh Gerry Mac Ruairc, Ollscoil na hÉireann, Gaillimh

An rud is spéisiúla ná nuair a bhreathnaíonn tú taobh thiar de na figiúirí sin agus nuair a bhreathnaíonn tú ar na cúrsaí le hardphointí, tá rud éigint<sup>2</sup> ar siúl ansin, gan amhras. Agus, ansin, is ansin a fheiceann tú an éagothromaíocht atá sa tsochaí agus ní maith an rud é sin mar tá tú...mar tá an scéal ann go bhfuil go leor daoine ó gach aicme ag dul ar aghaidh go dtí an tríú leibhéal. Ach, ní mar an gcéanna an tríú leibhéal do na daoine sin agus sin í an fhadhb agus sin í an áit ar féidir a fheiceáil go bhfuil fadhb ansin ó thaobh cúrsaí eacnamaíochta de.

### Sinéad Ní Neachtain

Tá Sinn Féin le thíocht<sup>3</sup> le chéile sa mbliain<sup>4</sup> nua le plé a dhéanamh ar na bealaí a bhféadfaí na cearta oideachais céanna a chur ar fáil do gach dalta.

### An Comhairleoir Cathal Ó Conchúir, Sinn Féin

Táimid ag iarraidh a thíocht<sup>5</sup> le chéile go bhfeicimid an bhfuil bealach ar bith gur féidir linn an éagothromaíocht seo a cheartú agus go mbeidh an fháil chéanna<sup>6</sup> ag chuile<sup>7</sup> dhalta sa tír seo, chuile mhac léinn sa tír seo ar oideachas tríú leibhéal agus go mbeidh cothromaíocht ann agus nach mbeidh an éagothromaíocht seo ann – má tá maoiniú ag daoine sa mbaile<sup>8</sup>, go bhfuil siad beagnach cinnte go bhfaighidh siad áit ag an tríú leibhéal.

### Sinéad Ní Neachtain

Trí chéile agus taobh amuigh de chúrsaí a bhfuil ardphointí ag teastáil lena n-aghaidh, tá ardú tagtha ar líon na scoileanna gan táillí a bhfuil daltaí dá gcuid ag dul ar aghaidh chuig oideachas tríú leibhéal. Taispeánann na figiúirí go bhfuil trí scoil Lán-Ghaeilge ina measc siúd is mó a chuireann daltaí ar aghaidh chuig oideachas tríú leibhéal. Tá Coláiste na Coiribe anseo i nGaillimh ar an gceann is fearr acu sin.

Sinéad Ní Neachtain, Nuacht TG4 i nGaillimh.

---

<sup>1</sup> *scoileannaí* a deirtear i gcanúint Chonnacht

<sup>2</sup> *éigin* an leagan caighdeánach

<sup>3</sup> *le teacht* an leagan caighdeánach

<sup>4</sup> Córás Chonnacht

<sup>5</sup> *teacht* an leagan caighdeánach

<sup>6</sup> *an fáil céanna* a deirtear

<sup>7</sup> *gach uile* an leagan caighdeánach

<sup>8</sup> Córás Chonnacht